

# INUIT ATAQATIGIIT

## INATSISARTUNI



Nuuk, 22.12. 2011

§ 37 najoqqutaralugu Qorlortorsuarmi erngup nukinganik innaallagissiorfiliornermi saqitsaassutaasup aningaasartuutissartai pillugit apeqqutigisakka Naalakkersuisut akissuteqarfigimmatigit aallarniutigalugu qujassutigeqqarusuppara.

Taamaattoq Inatsisartut suleriaasianni § 37 naapertorlugu pineqartoq pillugu apeqquteqaq-qikkusuppunga, apeqqutiginiakkanni ulloq 20. december 2011-mi Naalakkersuisunit akissutigineqartut innersuussutigalugit.

(Inatsisartuni ilaasortaq Naaja Nathanielsen, Inuit Ataqatigiit)

1)

**Maleruagassat atuuttut malillugit sanaartortitsisup (Nukissiorfiit) aammalu entreprenørip akornanni sanaartugaq saqitsaassutigineqalerpat aningaasartuuteqarfiulerpallu, tamanna Naalakkersuisut ilisimatitsinerat naapertorlugu illoqarfimmi nunaqarfimmiluunniit innaallagissamik, imermik kiammillu pilersorneqartunit matussuserneqartussaapput. Innaallagissamut, imermut ataatsimoortumillu kiassarnermut immikkoortukkaanut aningaasartuutit naatsorsorneqartarnerini aningaasartuutit agguataarneqartarnissaannut periusissatut tunngavissanik aalajangersaasarneq pillugu Namminersornerullutik Oqartussat nalunaarutaat nr. 12, 10. august 2006-imeersoq tamatumani najoqqutarineqartoq Naalakkersuisut innersuussutigivaat.**

**Taamatut paasinninneq paragraffimi sorlermi imaluunniit paragraffini sorlerni Naalakkersuisunit erseqqissumik tunngavissaqartinneqarpa?**

2)

**Nalunaarummi § 7-mi "sanaartornermi aningaasartuutit" pineqartut Naalakkersuisut paasinninnerat naapertorlugu aamma tassaasinnaappat sanaartortitsisup inatsisilerinikkut/aningaasatigit saqitsaassuteqarnermi aningaasartuuteqarfigisai - saqitsaassutaasoq naak suli naammassineqanngikkaluartoq? Imaluunniit imaanerpa sanaartortitsinermi aningaasartuutaasimasut naatsorsorneqartarlutik sanaartornermi aningaasartuutaasimasut suliap naammassivinneqarnerani tamakivillugit aatsaat takussutissiorneqarsinnaaleraangata?**

3)

**Nalunaarummi § 12 ima oqaasertaqarpoq: "Aningaasaliinernut akiliutit agguasinermut naatsorsuutinut ilanngullugit naatsorsorneqartassanngillat. Akiliutilli naatsorsuutinut ilanngunneqarsinnaassapput Inuusutissarsiornermut Pisortaqarfik taamaasiornissamut akuersissuteqassappat. Taamaattoqassappat immikkoortukkaanut aningaasartuutip 5 %-a angullugu akiliutissaq naatsorsorneqarsinnaassaaq, tassungalu ilanngunneqartassalluni".**

**Nalunaarut naapertorlugu Qorlortorsuarmi erngup nukinganik innaallagissiorfiliaq tassaava "aningaasaliinernut akiliutit" (investering) imaluunniit (§ 7 malillugu)**

**“sanaartugaq”? (anlæg). Oqaraanni erngup nukinganik innaallagissiorfik tassaa-soq “aningsaaliinernut akiliutit”, taava Narsami Qaqortumilu atuisut procent-inik qassinik akiliisassasut isumaqatigiissutaasimava?**

**4)**

**Naalakkersuisut akissuteqaamminni allapput; Nukissiorfik saqitsaannermi ajorsartitaassagaluarpat akiligassanngorsinnaasut Narsami Qaqortumilu atuisunit akilerneqartariaqassasut aammalu periuseq tamanna sulianut siusinnerusukkut tassunga assingusunut assingulluinnartuusoq. Taamaammat aperissaanga:**

- Nalunaarut pineqartoq atortuulersinneqareernerata kingorna suliat assingusinnaasut qassiuppat?**
- Suliani taamaattuni aningaasat qanoq amerlassuseqarsimappat aammalu sumiifikkaartuni akigitinneqartunut qanoq tamakku sunniuteqarsimappat?**
- Nukissiorfiit saqitsaassuteqarnermi ajorsartitaassagaluarpat aningaasat qassit tassanga aningaasartuutigineqaratarsinnaassappat, Narsami Qaqortumilu atuisunit akilerneqartariaqartussat?**

**5)**

**Naalakkersuisut akissuteqaamminni allapput; Qorlortorsuarmi nukissiorfiliornermut atatillugu aningaasartuutit qanoq agguarneqarnissaannut tunngavissat allanngortinneqassagaluarpata tamanna isornartoqartinneqassasoq, allannguneq siusinnerusukkut sulianut tassunga assingusunut naapertuukkunnaassammat. Nukissiorfiup aalajangiineratigut sanaartukkat nutaat naammassineqarnerini inatsisilerinikkut saqitsaassutaalersut atuisunit akiligassanngortinneqartalissappata, taamaammat paaserusuppara tamanna “tunngavissat” aalajangiusimaneqarusunnerannik imaluunniit maleruagassat erseqqissuutittariaqarnerannik tunngaveqarner-soq? Matumani Nukissiorfiit sanaartortitsisutut akisussaaffimmik sumiginnaaratarsimasinnaanera eqqarsaatigaara. Naalakkersuisummi akissuteqaamminni nassuerutigivaat inatsisilerinikkut saqitsaassutaasoq Narsami Qaqortumilu atuisunut tutsinniarneqarsinnaanngitsoq. “Tunngavissat” maleruagassat erseqqissuusariaqarnerannut sanilliullugit pingaartinneqarnerussappata, maleruagassanik sa-neqqutaarinninngikkaluarluni siusinnerusukkut qanoq iliortarsimanerit aamma qimanneqaannarsinnaannginnamik?**

### **Tunngavilersuut**

Isumaga naapertorlugu Qorlortorsuarmi innallagissiorfimmut atatillugu maannakkut saqitsaassutaasoq imermut, innaallagissamut kiassarnermullu akit maannakkutut ilusilersorneqartarnerannut attuumassuteqarluartunik apeqqutunik arlalinnik tunngaviusumik qulaajarneqartariaqartunik imaqqarput.